

卷第二十一

治婦人諸病所由第一

《千金方》云：論曰：夫婦人所以有別方者，以其血氣不調，胎妊產生，崩傷之異故也。

所以婦人之病，比之男子十倍難療。若四時節氣為病，虛實冷熱為患者，與丈夫同也。唯懷胎妊挾病者，避其毒藥耳。

又云：女人嗜欲多於丈夫，感病則倍於男子，加以慈戀、愛憎、嫉妒、憂恚、深著堅牢，情不自抑，所以為病根深，療之難瘥。故傅母之徒亦不可不學。

《短劇方》云：古時婦人病易治者，嫁晚，腎氣立，少病，不甚有傷故也。今時嫁早，腎根未立，而產傷腎故也，是以今世少婦有病，必難治也。早嫁早經產雖無病者，亦夭也。

治婦人面上黑方第二

《病源論》云：婦人面上黑者，或臟腑有痰飲，或皮膚受風邪，血氣不調，致生黑。

若皮膚受風外治則瘥；腑腑有飲，內療方愈。

《僧深方》治婦人面方：

取茯苓，治篩，蜜和，以塗面，日四五。

又方：取桃仁，治篩，雞子白和以塗面，日四五。

《經心方》治面方：

取杏仁末和雞子白，敷之一宿，即落。

治婦人面上黑子方第三

《病源論》云：婦人面上黑子者，風邪搏血氣變化所生。

《如意方》去黑子方：

烏賊魚骨 細辛 栝萋 乾薑 蜀椒

分等，苦酒漬三日，牛髓一斤煎黃色，絞以裝面，令白悅，去黑子。（面黑子方詳在上帙四卷。）

#### 治婦人妒乳方第四

《病源論》云：婦人妒乳者，由新產後，兒未飲之，或飲不能泄，或新斷兒乳，捻（都念反，下也。）其乳汁不盡，皆令乳汁蓄結，與血氣相搏，則壯熱大渴引飲，強掣痛，手不得近是也。初覺便以手助將去其汁，並令旁人助引之，不爾成瘡有膿，其熱勢盛則結變成癰。

《短劇方》治妒乳方：

以雞子白和小豆散塗乳房，令冷以消結也。

又方：黃芩 白蘘 夕藥

三物，分等，下篩，以漿服一錢五七，日五服。（《集驗方》同之。）

又云：宜以赤龍皮湯，天麻草湯洗之，敷黃連胡粉膏。

赤龍皮湯：槲樹皮切三升，以水一斗，煮取一斗五升，夏月冷用之，秋冬溫之，分以洗乳。

天麻草湯：天麻草切五升，以水五升，煮取一斗，隨寒溫分洗乳。（今按：《耆婆方》芫蔚一名天麻草。）

《葛氏方》治婦人妒乳腫痛方：

削取柳根皮熟搗，火溫帛裹熨上，冷更易。

又方：梁上塵，苦酒和塗，又治陰腫。

又方：末地榆白皮，苦酒和敷。

又方：白芨、夕藥。酒服方寸匕，又可苦酒和塗之。

又方：鼠婦蟲，以塗之。

又方：車前草搗，苦酒和，塗之。

《產經》妒乳方：

取牛屎燒末，以苦酒和，塗上。

又方：左乳結者，去右乳汁；右結者，可去左乳汁。（《集驗方》同之。）

《集驗方》治妒乳方：

急灸兩手魚際，各二七壯，斷癰脈也。

又方：以雞子白和小豆散塗乳房，令消結也。

又方：取葵莖搗篩，服方寸七，日三，即愈。

又方：搗生地黃，敷之，熱則易。

## 治婦人乳癰方第五

《病源論》云：婦人乳癰者，腫結皮薄以澤，是為癰也。寒搏於血則澀不通，而氣積不散，故結聚成癰。亦因乳汁蓄結，與血相搏，蘊積而成癰也。乳癰年四十已還，治之多愈；年五十以上，慎，不當治之，多死。乳癰久不瘥，因變為（章俱反）。

《養生方》云：婦人熱食汗出，露乳蕩風，喜發腫，名吹乳，因喜作癰。

《短劇方》治乳癰方：

大黃(二分) 草(二分) 伏龍肝(二分) 生薑(二分)

凡四物，合篩，以薑並舂治，以□（呼雞反）和，塗乳有驗。

《范汪方》治婦人乳癰方：

大黃，治篩，和生雞子，敷腫上，燥複更敷，不過三，愈。

又方：灶中黃土以雞子黃和，塗之。

又方：熬粉水和，敷之。

又方：大黃、鹿角，二物分等，燒鹿角與大黃篩，以雞子白和，貼之。

《僧深方》治乳癰方：

末黃柏，雞子白和，塗之。

又方：搗根，敷之。

又方：赤小豆末，雞子白和，敷之。

又云：治婦人乳癰生核，積年不除，消核防風敷方：

草(八分) 芎(八分) 大黃(十分) 當歸(十分) 防風(十分) 夕藥(十分)  
白蘘(十分) 黃耆(十二分) 黃連(十分) 黃芩(十分) 枳子中仁(四分)  
十一物，治篩，以雞子白和，塗故布若練上，以敷腫上，日四五，夜三。

《千金方》乳癰二三百日，眾療不瘥，但堅紫色方：

柳根削上皮，搗熬令溫，盛囊熨乳上。(《集驗方》云：一宿則愈。)

《醫門方》療婦人乳癰初得令消方：

赤小豆，草各分等，苦酒和，塗上立愈。

《龍門方》治乳熱腫方：

冷石熨之，瘥。

又方：取朱書乳，作魚字，驗。(《范汪方》同之。)

《錄驗方》治乳癰堅如石，眾醫不能治方：

桂心(二分) 烏頭(二分) 甘草(二分)  
凡三物，冶合，淳酢和，塗腫上。

《產經》乳癰符□(用新筆朱書腫上。)

又方：取焦瓦搗碎，和酢，塗之立瘥，乾易。

## 治婦人乳瘡方第六

《病源論》云：此謂膚腠虛，有風濕亦氣，乘虛客之。與血氣相搏，而熱加之，則生瘡。

《范汪方》治乳端生氣出汁痛方：

鹿角(二分，燒) 甘草(一分)

治合，和雞子黃，置暖灰上，令溫，日二敷之。

《醫門方》療乳頭裂破方：

搗丁香，敷之，立瘥。(今按：《崔侍郎方》同之。)

《僧深方》取韭根燒，粉瘡，良。

《集驗方》婦人女子乳頭生小淺熱瘡，搔之黃汁出，浸淫為長。百種治不瘥者，經年月，名為乳病。宜以赤龍皮湯及天麻草湯洗之。敷二物飛烏膏及飛烏散。

飛烏膏方：

用燒朱砂作水銀上黑煙，名汞(胡動反，盧谷反)粉者(三兩) 礬石(三兩，熬令焦)

二物，下篩，以甲煎和之，令如脂以敷乳瘡，日三。作散不須和，有汁有自著者可用散。亦敷諸熱瘡、黃爛、浸淫汁癢瘡、丈夫陰蝕癢濕、小兒頭瘡、月食耳瘡、口邊肥瘡、蝸瘡，悉效。

又云：若始作者，可敷黃連胡粉散，佳。

黃連胡粉膏散方：

黃連(二兩) 胡粉(十分) 水銀(二兩)

凡三物，末黃連，令消，以二物相合，合皮裏熟之，自和合也，縱不成一家，且得水銀細散入粉中也。以敷乳瘡，諸濕癢瘡，若著甲煎，為膏。

## 治婦人陰癢方第七

《病源論》云：婦人陰癢，是蟲食所為，其蟲動作勢微，故令癢，若重者則痛。

《葛氏方》婦人陰若苦癢搔者方：

蛇床草、節、刺，燒作灰，納陰中。

《孟詵食經》治婦人陰癢方：

搗生桃葉，綿裹，納陰中，日三四易。亦煮汁洗之。今按煮皮洗之，良。

《錄驗方》治婦人陰癢方：

枸杞根切一斤，以水三升，煮，適寒溫，洗之即愈。

《僧深方》婦人陰癢方：

黃連 黃柏各二兩，以水三升，煮取一升半，溫洗，日三。

《極要方》陰中及外癢痛方：

大黃(三兩) 甘草(二兩)  
水三升，煮取二升，漬洗，日三。

《集驗方》治婦人陰中癢如蟲行狀方：

礬石(三分，熬) 芎(四分) 真丹砂(少許)  
三物，下篩，以綿裹，納陰中，蟲自死。

## 治婦人陰痛方第八

《病源論》云：婦人陰痛之病，臟虛風邪乘之，沖擊而疼痛而已。

《葛氏方》婦人陰燥痛者方：

煮甘草，地榆，及熱，以洗之。

又方：以鹽湯洗之。

《延齡圖》云：若陰中重痛，灸枳實熨之，良。

## 治婦人陰腫方第九

《病源論》云：陰腫者，是虛損受風邪所為也。

《葛氏方》婦人陰腫痛者：

熬礬石二分，大黃一分，甘草半分炙，末，以綿裹如棗核，以導之。（《延齡圖》同之。）

又方：炙枳實熨之。

《僧深方》陰腫痛方：

黃芩（一分）礬石（一分）甘草（二分）  
下篩，如棗核綿裹，納陰中。

## 治婦人陰瘡方第十

《病源論》云：婦人陰瘡者，由三蟲九蟲動作侵食所為也。諸蟲在人腹內，腸胃虛損。則動作侵食於陰，輕者或癢或痛，重者生瘡也。

《葛氏方》治婦人陰中瘡方：

末硫黃，敷瘡上。

又方：燒杏仁，搗以塗之。

又方：末雄黃熬二分，礬石二分，麝香半分，和末敷之。（《延齡圖》同之。）

《極要方》治婦人陰瘡方：

取桃葉，搗絞取汁，洗之，日三。

《錄驗方》治婦人陰瘡方：

蛇床子（一升，熬）大黃（二分）胡粉（半兩）  
下篩作散，先以溫湯洗，以粉之。

《僧深方》女子陰中瘡方：

裹礬石末，如棗核，納陰中。

《范汪方》婦人陰瘡方：

地榆(二分) 甘草(一分)  
水煮，適寒溫，洗之良

《千金方》婦人陰瘡方：

野狼牙兩把切，以水五升，煮取一升，濕洗之，日五。(今按：《廣濟方》取汁和苦酒煎，塗，洗。)

又云：治男女陰蝕略盡方：

蝦蟆 兔屎  
二味，分等，搗篩，以敷瘡上。(《集驗方》同之。)

《劉涓子方》治婦人陰蝕當歸湯方：

當歸(二兩) 甘草(一兩) 芎(一兩) 夕藥(一兩) 地榆(三兩)  
上五物，以水五升，煮取三升，洗之，日三夜一。

《錄驗方》治婦人男子陰蝕及膿血不禁，男子莖盡入腹中，眾醫所不能治。大黃湯方：

大黃(二兩半) 黃芩(二兩) 黃柏(二兩) 半夏(二兩) 細辛(二兩) 生地黃(二兩) 虎掌(一兩半) 草(一兩半)  
凡八物，以新汲井水一斗，煮取三升，洗瘡，若陰裡病，取練沽湯中著陰道中，時複易，半日，久佳。惡汁盡當止，止濃劇當如針孔，勿怪也。

### 治婦人陰中息肉第十一

《病源論》云：陰內息肉由胞絡虛損，冷熱不調，風邪客之；邪氣乘陰，搏於血氣，變生息肉也。其狀如鼠乳。

《葛氏方》婦人陰中息肉突出者方：

以苦酒三升漬烏喙五枚，三日，以洗之，日夜三四過之。(《延齡圖》同之。)



又方：取豬肝炙熱，納陰中，即有蟲出著肝。

### 治婦人陰冷方第十二

《病源論》云：胞絡勞傷，子臟虛損風冷客之，冷乘於陰，故令冷也。

《千金方》治陰冷令熱方：

納食茱萸牛膽中令滿，陰乾百日，每取二七枚綿裹之，齒嚼令碎，納陰中，良久熱如火。

又婦人陰冷痛方：

灸歸來三十壯，三報，在俠玉泉五寸是也。

《延齡圖》云：療婦人陰冷方：

石硫黃(三分) 蒲黃(二分)

上二味，搗篩為末，三指撮(粗括反)納一升湯中，洗玉門。(當日急熱。)

### 治婦人陰臭第十三

《病源驗》云：陰臭由子臟有寒，寒氣搏於津液，蘊積，氣衝於陰，故變臭也。

《延齡圖》云：療婦人陰臭方：

槲皮(切，一升) 甘草(二兩) 當歸(三兩)

上，以水一斗，煮取三升，去滓，洗玉門內。日二度洗，如冷，加蛇床子並根莖二分。

治女陰寒臭方：

白藪(一分) 桂心(五分) 苦參(一分) 甘草(一分) 附子(一分)

五物，咀，水煮，洗之愈。

### 治婦人陰脫方第十四

《病源論》云：胞絡傷損，子臟虛冷，下脫，亦因產用力，陰下脫也。

《千金方》治下挺出方：

蜀椒(二分) 烏頭(二分) 白芨(二分)  
三味，篩，以方寸七綿裹，納陰中，入三寸，腹中熱，易之。

又治陰脫硫黃散方：

硫黃(二兩) 烏賊骨(二分) 五味子(三銖)  
三味，冶，下篩，以粉其上，良，日再三。

《經心方》陰脫下方：

礬石(雞子大二枚) 鹽(彈丸大一枚)  
二味，以水三升，煮，洗之，自愈。

《葛氏方》治婦人陰脫出外方：

水煮生鐵，令濃，以洗之。礬石亦良。(《僧深方》同之。)

又方：燒螻蛄末，以豬膏和，敷上，蒲黃粉之。

《極要方》陰脫方：取蛇床子熬，布裏熨之。

《僧深方》治婦人子臟挺出蛇床洗方：

蛇床子(一升) 酢梅(二七枚)  
二物，水五升，煮取二升半，洗之，日十過。

《集驗方》治婦人陰中癢脫下方：

取車 膏，敷之，即癢。

《經心方》治婦人陰挺出方：

灸臍中二壯，愈。

## 治婦人陰大方第十五

《延齡圖》云：療婦人陰寬冷，令急小，交接而快方：

石硫黃(二分) 青木香(二分) 山茱萸(二分) 蛇床子(二分)  
上四物，搗篩，為末，臨交接，納玉門中少許，不得過多，恐撮孔合。

又云：治婦人陰令成童女法：

蛇床子(三分) 遠志(三分) 石膽(三分) 山茱萸(三分) 青木香(三分) 細辛(半兩) 桂心(二分)

上七味，搗篩為散，置狗膽中，懸於屋內。陰乾六十日，藥成，搗為末，可丸如棗核大，著婦人陰中，急小而熱，不過三日。

又方：松上女蘿(一分) 石〔(音預)一分〕 石硫黃(一分)

上三味，分等，搗篩為末，納陰中，當日而急小，甚妙。

又方：取石硫黃末，二指撮，納一升湯水中，以洗，陰急小，如十二三女。

《千金方》治陰寬大令連小方：

菟絲子(二分) 干漆(一分) 鼠頭骨(二枚) 雌雞肝(三枚，百日陰乾。)

四味，丸如小豆，初月七日，合時一丸著陰頭，徐徐納之，三日知，十日小，五十日如十三女。

《錄驗方》治女急如童方：

食茱萸(三兩) 特牛膽(一枚) 石鹽(一兩)

搗茱萸下篩，納牛膽中，又納石鹽著膽中，陰乾百日，戲時取如雞子黃末，著女陰中，即成童女也。

## 治婦人小戶嫁痛方第十六

《集驗方》治童女始交接，陽道違理，及為他物所傷。血流離不止方：

取釜底黑，斷葫摩，以塗之。

又方：燒發，並青布末，為粉，粉之，立愈。(《葛氏方》麻油和塗。)

《千金方》治小戶嫁痛方：

烏賊魚骨二枚，燒為屑，酒服方寸匕，日三。

又方：牛膝五兩。一味，以酒五升，煮再沸，去滓，分三服。

《玉房秘訣》云：婦人初交，傷痛，積日不歇方：

甘草(二分) 夕藥(二分) 生薑(三分) 桂心(一分)  
水二升，煮三沸，一服。

### 治婦人陰丈夫傷方第十七

《集驗方》治女子傷於丈夫，四體沉重，虛吸頭痛方：

生地黃(八兩) 夕藥(五兩) 香豉(一升) 蔥白(切，一升) 生薑(四兩) 甘草(二兩，炙，切)

以水七升，煮取三升，分三服，不瘥，重作。

《千金方》治合陰陽輒痛不可忍方：

黃連(六分) 牛膝(四分) 甘草(四分)

三味，水四升，煮二升，洗之，日四。

又女人交接輒血出方：

桂心(二分) 伏龍肝(三分)

二味，酒服方寸匕，日三。(《劉涓子方》同之。)

《玉房秘訣》云：女人傷於夫，陰陽過。患陰腫疼痛欲嘔方：

桑根白皮(切，半升) 乾薑(一兩) 桂心(一兩) 棗(三十枚)

以酒一斗，煮三沸，服一升，勿令汗出當風，亦可用水煮。

### 治婦人脫肛方第十八

《病源論》云：肛門，大腸候也。大腸虛冷，其氣下冲者，肛門反出。亦有因產用力怒體，氣衝其肛，亦令反出也。

《千金方》治脫肛若陰下脫方：

以鐵精敷上，灸布令暖，以熨肛上，漸推納之。

《集驗方》治婦人脫肛若陰下脫方：

蛇床子布裹，灸熨之，亦治產後陰中痛。

### 治婦人月水不調方第十九

《病源論》云：衝任之二經，上為乳汁，下為月水。若冷熱調和，則血以時而下。寒溫乖適，則月水乍多乍少，不調也。

《千金方》治月水不調，或在月前，或在月後，或多，或少。乍去乍來方：

生地黃三斤，酒煮，取二升服之。

又方：地黃酒及大豆酒亦佳。

《極要方》治月水不調方：

以酒服桂末方寸匕，日二。《玄感敷尸方》同之。

《新錄方》治虛憊（蒲釋反，病也），月經一月再至方：

夕藥三十二枚（重一斤，）酒一斗，漬夕藥，令釋濡出，曝之，乾者復納酒中，復曝之，如是令酒盡，燥，搗篩，服方寸匕，日三。

### 治婦人月水不通方第二十

《病源論》云：婦人月水不通者，由勞損血氣，致令體虛，受風冷也。

《千金方》治月水不通方：

葶藶子一升，搗，蜜和，如彈丸三枚，綿裹，納陰中，入三寸，一宿易，有汁出止。

《新錄方》治月水不通方：

麻子，搗絞取汁服，日三。

又方：芎 末，以酒服方寸匕。

又方：桂心一尺，末，以酒服，日三。

又方：當歸，末，酒服方寸匕。

又方：小豆一升，苦酒一斗，煮取三升，服任意多少，立下。

《極要方》療婦人月水不利，血瘀不通，或一月或一歲，令人無子，腹堅如石，亦如妊娠之狀方：

大黃(四兩) 夕藥(二兩) 土瓜根(一兩)  
上，為散，酒服方寸匕，日三，血下，痛即愈。

《葛氏方》治婦人月水不利，結積無子方：

大黃 桃仁 桂心(各三兩)  
搗末，未食，服方寸匕，日三。

又云：或至兩三月、半年、一年不通者：

桃仁(二升) 麻子仁(二升)  
合搗，酒一斗，漬一宿，服一升，日三夜一。

### 治婦人月水不斷方第二十一

《病源論》云：衝任之氣虛損，故不能製其經血，故令月水不改。

《僧深方》治婦人月水不止方：

黃連，治，下篩，以三指撮，酒和服，不過再三。

又方：服淳酢一瓠，不瘥，更服。

《撰集要方》治月水不止方：

服蒲黃良。

《千金方》月水不斷方：

灸內踝下白肉際青脈。

### 治婦人月水腹痛方第二十二

《病源論》云：月水來腹痛者，由勞損血氣，體虛受風冷，故令痛也。

《耆婆方》治婦人月節來腹痛血氣方：

防風(二兩) 生薑(六兩) 濃朴(三兩, 炙) 甘草(二兩) 朮(二兩) 枳實(二兩, 炙) 桔梗(一兩)

七味, 切, 以水六升, 煮取一升半, 去滓, 分為三服。

《僧深方》治月經至絞痛欲死茯苓湯方：

茯苓(三兩) 甘草(二兩) 夕藥(二兩) 桂心(二兩)

凡四物, 切, 以水七升, 煮取二升半, 分三服。

《百病針灸》治月水來腹痛方：

灸中極穴, 在臍下四寸。

《廣濟方》治月水來腹痛方：

當歸 甘草(各八兩) 夕藥 茯苓 桂心(各十二分)

以水六升, 煮取二升, 絞去滓, 分溫三服, 服別相去, 如人行六七裡, 忌生冷、海藻。

### 治婦人崩中漏下方第二十三

《病源論》云：崩中之病, 是複損衝脈, 任脈。衝任之脈, 起於胞內, 為經脈之海。勞傷過度, 衝任氣虛, 不統製其經, 故血忽然崩下, 謂之崩中。而內有瘀血, 故時崩時止, 淋瀝不斷, 名曰崩中漏下也。

又云：漏下不止, 致損五臟, 五臟之色, 隨臟不同, 因虛其五色與血而俱下。其狀, 白者如涕, 赤者如紅汁, 黃者如爛瓜汁, 青得如藍色, 黑者如血也。

《短劇方》治婦人崩中, 晝夜十數行, 醫所不能治方：

芎(八兩)

上一物, 以酒五升, 煮取三升, 分三服, 不耐酒者, 隨多少服之。(《千金方》同之。)

又治婦人五崩下赤白青黃黑大棗湯方：

大棗(百枚) 黃耆(三兩) 膠(八兩) 甘草(一尺)

凡四物，以水一斗，煮取三升半，內膠令烊，分三服。今按：《本草》云：甘草一尺者，重二兩為正。

又治漏下神方：

取槐耳，燒，搗，下篩，酒服方寸匕，日三，立愈。(今按：《千金方》：燒子酒服之。)

又治婦人漏下病不斷，積年困篤方：

取鵲重巢柴，合燒末，服方寸匕，日三。鵲重巢者，去年在巢中產，今歲更在其上複作巢是也。(《集驗方》同之。)

又治崩中去血方：

舂生薊根汁一升，溫頓服之，亦可以酒煮，隨意服之。

又方：舂生地黄汁一升，頓溫服之，即止。(已以《千金方》同之。)

《醫門方》治久崩中晝夜不止，醫不能療方：

芎(八分) 生地黄汁(一升)

凡以酒五升，煮取二升，去滓，下地黄汁煎一沸，分三服，相去八九裡。不耐酒者，隨多少，數數服即止，但此二味可單用服之。

《千金方》治婦人漏赤不止，晝夜上氣虛竭方：

龜甲(炙) 牡蠣

二味，分等，為散，酒服方寸匕，日三。

又方：燒亂髮，服方寸匕，日三。

又治五色 下方：

大豆紫湯，日三服，佳。

又方：煮甑 汁服之。

又方：服蒲。



又灸崩中方：

灸小腹橫紋，當臍孔直下，一百壯。

又方：灸關元兩旁，相去三寸。

《葛氏方》治婦人崩中漏下及月，去青黃赤白使無子方：

鹿茸(二兩) 當歸(二兩) 蒲黃(二兩)

搗篩，酒服五分七，日三，加至方寸七。(《錄驗方》同之。)

又方：赤石脂蜜丸，服如梧子三丸，日三。

又方：露蜂房燒末，三指撮，酒服之，良。

《廣利方》治崩中漏下血方：

凌霄花末，溫酒服方寸七，日三，即止。

《僧深方》治崩中方：

桑耳 乾薑(分等)

下篩，酒服方寸七，日四五。

又方：白茅根二十斤，小薊根十斤，搗，絞取汁，煮取五升，服一升，日三四。

《經心方》治長血芎 丸方：

鹿茸(二兩) 當歸(二兩) 蒲黃(二兩) 阿膠(二兩) 芎 (二兩) 白朮(三兩)  
乾地黃(三兩)

凡七物，搗，篩，和丸如大豆，服十丸，日三。

又方：生地黃，蓮根分等，搗，絞取汁，煎，服任意。

龍骨丸治長血方：

龍骨 阿膠(炙) 赤石脂 牡蠣 乾地黃 當歸 甘草(炙，各二兩) 蒲黃(三兩)

凡八物，搗，篩，丸如梧子，服十五丸，日三。

《龍門方》療婦人 下方：

人參(一兩) 茯苓(二兩) 牡蠣(五兩，別研)  
餘者末，和，飲服酒亦得，日再，以瘥為度。

又方：灸臍左右各一寸五分，各三百壯。

《集驗方》治婦人漏下不止散方：

鹿茸(三兩) 當歸(二兩) 蒲黃(一兩) 阿膠(三兩，炙) 烏賊骨(二兩，去甲)  
下篩，為散，酒服方寸匕，日三夜再。(《千金方》同之。)

《蘇敬本草注》云：刮牛黃服之。

《崔禹錫食經》云：海蠃子刮服之。

#### 治婦人下三十六疾方第二十四

《病源論》云：諸方說，三十六疾者，是十二症、九痛、七害、五傷，三固，謂之三十六疾也。十二者，所下之物，一如膏白，二如清血，三如紫汁，四如赤肉，五如膿痂，六如豆汁，七如葵羹，八如凝血，九如清血，血似水，十如米汁，十一如月浣，十二經廢不應期也。九痛者，一陰中痛傷，二陰中淋痛，三小便來即痛，四寒冷痛，五月水來腹痛，月水止則不止，六氣滿崩痛，七汗出，陰中如蟲嚙痛，八脅下引痛，九腰痛也。七害者，一害食，二害氣，三害冷，四害勞，五害房，六害妊，七害睡也。五傷者，一窮孔痛，二中寒熱痛，三少腹急痛，四臟不仁，五子門不正，引背痛。三固者，一月水閉塞不通，其餘二固者，文闕不載。(今按：《千金方》云：三固者，一羸瘦不生肌膚，二絕產乳，三月水閉塞也。七害者，一窮孔痛不利，二中寒熱痛，三少腹急痛，四臟不仁，五子門不端，六浣乍多乍少，七喜吐陽精也。五邪傷者，一兩脅支滿痛，二心痛引脅，三氣結不通，四邪惡泄利，五前後固塞也云云。)

《千金方》白惡丸主婦人三十六疾病各異同。療之方：

白惡(三分) 龍骨(三分) 夕藥(二分) 黃連(二分) 當歸(二分) 茯苓(二分)  
黃芩(二分) 瞿麥(二分) 白藜(二分) 石韋(二分) 甘草(二分) 牡蠣(二分)  
細辛(二分) 附子(二分) 禹余糧(二分) 白石脂(二分) 人參(二分) 烏賊骨  
(二分) 甘皮(二分) 本(二分) 大黃(二分)

二十一味，下篩，蜜丸如梧子，未食服十丸，日二，不知，稍增。服藥，二十

日知，三十日百病悉愈。（今按：《短劇方》有桂心四分、白芷四分，無甘皮、本。）

### 治婦人八瘕方第二十五

《病源論》云：八瘕病者，皆胞胎生產，月水往來，血脈精氣不調之所生也。其八瘕者，黃瘕、青瘕、燥瘕、血瘕、脂瘕、狐瘕、蛇瘕、鱉瘕也。

《千金方》婦人血瘕痛方：

乾薑（一兩） 烏賊魚骨（一兩）  
二味，治，篩，酒服二方寸七，日三。

《錄驗方》治婦人臍下結物，大如杵升，月水不通，發熱往來，下利羸瘦。此為氣瘕也，故生肉瘕，不可治；未生肉瘕，可治。

干漆丸方：

生地黃（三斤，一方二十斤，取汁） 干漆（一斤，熬，搗，篩）  
凡二物，地黃搗，絞取汁；漆治，下篩，納地黃汁中，微火煎令可丸，藥成，酒服如梧子十五丸，當以食後服之。（《葛氏方》同之，《集驗方》服三丸。）

《玄感敷尸方》治血症如四五月身大方：

浸前件二味，五日以後取服，一服一盞，溫服之良。

### 治婦人遺尿方第二十六

《病源論》云：婦人遺尿候，腎虛冷，冷氣入胞，胞虛冷，不能製小便，遺尿也。

《錄驗方》治婦人遺尿方：

礬石（三兩，燒令沸，汗盡） 牡蠣肉（三兩）  
下篩，為散，酒服方寸七，日三。（《集驗方》各二兩。）

### 治婦人尿血方第二十七

《病源論》云：血性得寒則凝澀，得熱則流散，若勞傷經絡，其血虛。熱滲入於胞，故尿血。

《極要方》婦人無故尿血方：

龍骨五兩，為散，空腹，服方寸匕，日三。

《千金方》治婦人無故尿血方：

取其夫爪甲，燒作末，酒服之。

又方：取船故竹茹，曝乾，搗末為散，酒服方寸匕，日三。

《葛氏方》治婦人尿血方：

車前草一斤，水一斗，煮取四升，分四服。

又方：葵根、莖、子，無在，取一升，水四升，煮取一升，納書中白魚蟲十枚，研，服一合。

### 治婦人瘦弱方第二十八

《玄感敷尸方》主婦人年老體漸瘦弱，頭面風腫，骨節煩疼，冷，口乾狀如骨蒸者，是牛膝酒方：

牛膝（一斤） 生地黃（切，三升） 牛蒡（切，曝乾，一斤） 生薑（合皮切，一升） 凡四味，切，於絹袋盛之，以清酒一大升，浸七日，溫服一盞，日三。

### 治婦人欲男方第二十九

《太清經》云：皇帝問素女，對曰：女人年二十八九，若二十三、四，陰氣盛，欲得男子；不能自禁，食飲無味，百脈動體，候精脈實，汁出污衣裳，女人陰中有蟲如馬尾，長三分，赤頭者悶（莫困反，煩也。），黑頭者沫（莫葛反）。

治之方：用面作玉莖，長短，大小隨意，以醬清及二辨，綿裹之，納陰中，蟲即著來出。出復納，如得大夫。其蟲多者三十，少者二十。

### 治婦人鬼交方第三十

《病源論》云：婦人夢與鬼交通者，亦由腑臟氣弱，神守虛衰，致鬼靈因夢而交通也。

《玉房秘訣》云：採女曰：何以有鬼交之病。彭祖曰：由於陰陽不交，情欲深重，即鬼魅假像與之交通，與之交通之道，其有勝於人，久則迷惑，諱而隱之，不肯告人，自為佳，故至獨死而莫之知也。

治之法：但令女與男交而勿瀉精，晝夜勿息困者，不過七日，必愈；若身體疲勞，不能獨御者，但深按勿動亦善。

又方：當以石硫黃數兩，燒以熏婦人陰下體體，並服鹿角末方寸七，即愈矣，當息，鬼涕泣而去。

一方云：服鹿角方寸七，日三，以瘥為度。

《短劇方》別離散治男女風邪，男夢見女，女夢見男，悲愁憂患，怒喜無常，或半年，或數月，日複發者方：

楊上寄生（三兩）朮（三兩）桂肉（一兩一方三兩）茵芋（一兩）天雄（一兩，炮）  
□根（一兩）薊根 菖蒲（一兩）細辛（一兩）附子（一兩，炮）乾薑（一兩）

凡十物，合搗，下篩，酒服半方寸七，日三。合藥勿令婦人，雞犬見之。又無令見病者，病者家人見合藥，知藥者，令邪氣不去，禁之，為驗。

《千金方》治婦人忽與鬼交通方：

松脂（二兩）雄黃（一兩）

二味，先煇松脂，乃納雄黃末，以虎爪絞令相得。藥成取如雞子中黃，夜臥以著熏籠中，燒令病患自升其上，以被自覆，唯出頭，勿令過熱，及令氣得泄也。

《玄感敷尸方》主婦人患骨蒸者，多夢與鬼夫交接。為之方：

雄黃（一兩，破）虎爪（一枚，末）沉香（一兩，末）青木香（一兩，末）松脂（二兩，破）

凡五味，合，和以蜜丸，丸如彈丸，納火籠中，以熏陰，夜別一度，大良。

《短劇方》云：婦人欲斷生方：

故布方圓一尺，燒作屑，以酒飲之，終身不生產。

《千金方》云：斷產方：

灸右踝上一寸三壯，即斷。

又方：蠶子故布方尺，燒末，酒服之。